

No Servus, Diener und Habe die Ehre!

Etze kömmt dos

Nej su wos

vu Sömde, n 26. August 2023



Herbert Stumpe

Hundrt Perzent

An Oubde, wenn ich su ban Biere sitze, gieht mr su ollerlej dorchn Koup. Najchtn ho ich enn extrichn Brass gehobt, dos kon ich euch sohn. Dou ho ich wiedr amoul eis Fernseh neigekuckt. Und wie se su bei dr Werbung worn, dou dochte ich, dos dorf ne wuhr sein!

Obr erscht amoul wos, wu ich mich dro derinnert ho, wie ich de dötte Werbung gesahn hotte: Nouch enn Fussballspiele hottn se enn vu dan Spielern gefroit, wiesu se gewunn hottn. Und dou sohte dar, sie hettn „hundrtzwantsch Perzent“ gegahn. Und ich dochte: „Wie gieht denn dos?“ Wall ei dr Schule hotte iech gelarnt, doss Olles zusomm hundrt Perzent sein selle. Und wie konste denn mieh gahn wie Olles? Dou kenntste jo ou vrliern, wall de ock hundrtzwantsch, dr andre obr hundrtfuchtsch Perzent gegahn hotte. Odr glei zwejhundert. Oder noch mieh!

Su nabnbei: Iech ho ei dr Schule immr de Mathematik garne gehot. No, und Deutsch (wajgn dan Genitiv!). Obr Mathe vill mieh. No gutt, etze de Familie ou und de Froue und de Kindr. Obr on ollrmejsn de Mathematik (und Deutsch!). Wie gesoht, sitte sportlichn Rechnkinstler hon mich schunt frieher gewurmt, und ich dochte, dosse amende zu vill mitn Koup gespielt hottn.

Obr itze zur Werbung: Dos ging jo schunt frieher lus: Dou hon se gesoht, dou gäbs a Schampo, dos „bis zu hundrt Prozent“ vu denn Schuppn beseitichen konnte. No, dochte ich, mieh selltn se ou besser ne wegmachn, dos konnte die Kouphaut steern. Obr ejgol, wenn gornischt vu dan Schuppn verschwindn täte odr ou ock de Helfte, wär dos jo ou ei Ornung. Se sohtn jo: „BIS zu hundrt Prozent“, und dos kon vu nischt bis olles sein.

Nejsn tut mich, doss ou andre druf gekumm sein, doss dar Bledsinn ane gude Masche is: Itze hoste ane Zohnvrsicherung an Ogeboute, die zohn „bis zu hundrt Prozent“ vu dennr Rechnung. Wos bedott denn dos? Dou zohn se NISCHT drzune und hon trotzdem Rajcht? Obr dou drfier bieten se drnabn noch ane Zohnreinichung o, wu se „bis zu 200 Euro Zuschuss“ gahn wolln. Dar gleiche Schmorrn!

Ieberleht amoul, wie dos wäre, wenn mier ou su kajkn tetn: „Herr Lehrer, ich ho bis zu hundrt Perzent vu menner Hausaufgabe gemacht.“ „Su enn Stiefl Bier mit drei Littn trink iech euch ei enn Zuge bis zu hundrt Perzent aus.“ Odr mir sohn iedr de Allgäuer Zeitung, dos „Nej su wos“ tätn bis zu hundrt Perzent vu olln Leutn lasn, die de Zeitung kejfn.

Denkn die döttn Werbefritzn einklich, doss mier olle blede sein? Mr hiern „Hundrt Prozent“ und kejfn dan Drajk? Obr iech worte ock druf, bis sich dar Mist ou ei andre Spartn iebtreht. Dou kennt ou ihr druf wortn, dos mechte gor ne su lange tauern. Wall: Wos Bledes word ömmer vu noch Bledern nouchgemacht. Mejntr ne ou?
